
Yu save wanpela lip i kisim hamas dei antap long diwai?

Yu sindaun sampela taim na tingting long dispela tu, bilong wonem diwai istap? Long front long haus tasol yu lukim wanpela mango diwai, na long baksait wanpela mon diwai i sanap istap. Olgeta hap yu raun yu lukim kain kain diwai istap. Yes dispela ol diwai istap na yumi stap. Diwai igat kain kain wok tu em i helpim yumi man wantaim olgeta samting yumi laikim na kisim long diwai.



Parataxonomist Chris. Dahl i sekim na rekotim gro blong ol lip bilong diwai.

Sampela diwai i traipela tru na sampela i liklik tru olsem grass. Aninit long as blong diwai yu lukim lip istap, sampela braunpela na yelopela em ol olupela na i pundaun long giraun. Taim dispela ol lip stap igo, em i sting na em tanim long giraun na givim gris gen long giraun na mekim narapela diwai i gro, na em igo olsem olsem....

Orait Yu kisim wanpela dispela braun o yelopela lip na askim yu yet. Mi sawe long dispela wanpela lip, em i kisim hamas dei na mun long taim em i kamap liklik tru igo inap em i olupela na pundaun long giraun? Em strongpela askim liklik, planti yumi no klia long dispela samting, yumi save tasol long yusim diwai long gutpela sindaun na laip blong yumi olsem yumi stap amamas.

Planti taim yu harim, **Mangi binatang** o Parataxonomist na dispela ol mangi isawe mekim wonem kain wok. Noken ting ol mekim wok binatang tasol, nogat ol save mekim planti kain kain wok wantaim ol bikpela saveman (saintist) bilong binatang na diwai. Wanpela bikpela wok ol sawe mekim em long luksawe na skelim gro

bilong wan wan lip bilong diwai.

Pastaim ol i makim na kisim diwai insait long bus ikam long liklik gren haus na lukautim igo bikpela. Bihain ol i rekotim dei/det taim liklik kru i bruk na kamaut namel long dispela diwai. Na taim niupela lip i kisim namel mak blong yangpela na olupela lip ol i kisim mak blong longpela na sotpela blong lip. Ol i wetim dispela lip igo taim em i olupela na klostu laik pundaun long giraun ol i makim gen det em i pundaun.

Yu lukim ol i skelim gut na ol i sawe tru long longpela bilong wanpela lip taim em i putim liklik lip antap long mama diwai igo inap long taim em i bikpela lip na i pundaun. Nau yu sawe dispela lip nau yu holim i kisim hamas de na mun long stap laip antap long mama diwai igo inap em i pundaun.
